

# Reinkarnashon

Kiko ta sosodé na momentu di morto? Mayoria religion ku nos konosé ta kere ku alma di e defunto ta bandoná e kurpa i ta sigui eksistí. Hinduísmo, en kontraste, ta siña ku e alma ta nase atrobe den un otro kurpa, i ora e kurpa ei ta fayesé, e alma ta bolbe nase. E siklo aki ta keda ripití—kisas asta shen biaha—pa e alma por wòrdu purifiká i porfin alkansá perfekshon. E siñansa aki ta konosí komo reinkarnashon.

Den kada siklo di bida e alma tin oportunitat di hasi bon òf malu. Si e persona ta hiba un bon bida, e tin bon karma, i e próksimo biaha ora e ta nase, e lo nase den un kondishon mas deseábel. Di otro banda, si e ta hasi malu, e ta akumulá mal karma, i e lo wòrdu reinkarná komo un ser ménos deseábel.

Diferente religion—inkluyendo algun ku ta infektá nos islanan—ta introdusí reinkarnashon na un forma modifiká, sin e siñansa di mal karma. Pa algun hende, reinkarnashon ta un doktrina atraktivo, ma e ta introdusí otro problema serio.

**Reinkarnashon ta insistí ku inhustisia no ta eksistí.** Tin un splikashon simpel pa kos malu ku ta sosodé: E persona ta haña kastigu pa loke el a hasi den su bida anterior. Ken tin kurason pa splika na e mucha ku a nase deformá, e mucha ku ta muri di hamber, e mucha indefenso batí pa su tata burachi, “Ta drechi pa bo! B’a haña loke bo ta meresé. Bo ta sufri pa motibu di piká den bo bida anterior...maske bo’n ta kòrd’é”?

Di bèrdat, **reinkarnashon ta un siñansa kruek.** Ademas, e tambe ta hustifiká tur klase di barbaridat. Shirley MacLaine, un vosero di e siñansa aki, hustifikando su inmoralidat a bisa ku e tabata atraí na e hòmber pasobra e por tabata su yu den un bida anterior. Un esposo infiel por argumentá ku su esposa ta haña loke e tabata meresé pasobra den su bida anterior e esposa lo a kòrta orea di su kasá. Por usa e mésun argumento absurdo pa atrako, violashon, sukuestro, èts.

**E inhustisia ku reinkarnashon supuestamente ta splika di bèrdat ta promové mas inhustisia.** E pais unda hinduísmo ta manda, ta un bon ehèmpel di esaki. Na India, e Brahmin—e persona konsiderá mas puru—por trapa riba un mucha ku ta muri di hamber sin sintimentu di kompashon, pasobra e mucha ta haña loke e ta meresé for di un bida anterior. Yudansa lo prevení alma di e mucha di ser purifiká dor di sufrimentu i komo resultado lo prolongá su sufrimentu den e próksimo bida.

**Ku reinkarnashon, asta e malbado di mas grandi, ta yega na perfekshon finalmente,** maske un tiki mas tardá. F. LaGard Smith a skirbi: “*Tur hende ta gana*, inkluyendo e gai na kantor ku a preveníbo di haña e promoshon meresí, e mayor ku a abusá seksualmente di bo, e kasá ku a bandonábo pa un otro. Si, *tur hende ta gana*—asta...Adolf Hitler, Idi Amin, Koronèl Gaddafi, i Ayatollah Khomeini. Ta bèrdat ku nan lo ta e últimonan pa yega... *Ku reinkarnashon, ningun hende ta pèrdé!*”

Talbes esei mes ta un motibu ku tantu hende—asta na nos islanan—ta atraí na e siñansa aki. Erwin Lutzer i John DeVries ta bis’é bon, “Reinkarnashon ta atraktivo pasobra e ta enkurashá hende pa sigui biba manera nan ta biba...sin mester atmití nan piká..dilanti Dios. Na morto, Dios simpelmente no ta aparesé. No tin akontabilidat personal, no tin huisio. Solamente un otro oportunitat pa biba atrobe i e biaha aki purba ‘biba bon’.”

Beibel ta siña algu totalmente diferente for di reinkarnashon. Skritura ta laga sa ku maske tin inhustisia den mundu awor, Dios lo regla kuenta un dia. Palabra di Dios ta bisa bon kla, “hende ta destiná pa muri un biaha so i despues di esaki ta bin huisio” (Hebreonan 9:27). Bo tin solamente ún oportunitat pa biba. Despues di morto no tin mas chèns pa wòrdu purifiká di bo piká! Dia ta yega pronto ku bo lo para dilanti e Hues hustu, Bo protesta lo zona masha fofo: “M’a kere den reinkarnashon...!”